

6.5.96  
Rusie Waltho  
papek

**WAAROM DIE NASIONALE PARTY VIR DIE GROND-  
WET MOET STEM**

**A. DIE PROSEDURELE IMPERATIEF**

1. Indien die NP aankondig dat hy teen die grondwetlike teks gaan stem, verloor die Party effektief sy invloed op die verdere verloop en inhoud van daardie teks.

2. Indien die NP sou aankondig dat hy teen die grondwetlike teks gaan stem - wat nie later kan wees as Maandag-middag nie, anders wat gaan die NP-sprekers in die debat sê? - laat dit twee dae aan die ANC om die huidige ooreengekome teks deur amendemente, wat na goeddunke van die voorsitter van die GV ter Tafel geneem mag word, só te verander dat dit hulle pas. Dit is prosedureel moontlik, omdat al sou die Reëls dit nie toelaat nie, kan die GV die Reëls met 'n gewone meerderheid ophef. Hieronder sal aangetoon word watter winste die NP in die huidige teks behaal het wat in daardie omstandighede geheel en al van die tafel gevee kan word.

3. Selfs indien die ANC die ooreenkomste in die huidige teks gestand doen, sal 'n verwysing na die Paneel steeds die deur vir hulle ooplaat om daarna verdere wysigings ten kwade aan te bring. Indien die opinie aanvaar word dat daar slegs twee tekste ingevolge artikel 73(5) ter sprake is (wat nie vasstaan nie), naamlik die teks soos verwys na die Paneel en die teks soos gewysig deur die Paneel, is daar **niks** in die Grondwet wat die GV verbied om enige van die twee tekste te wysig wanneer dit na afloop van die Paneel se werksaamhede 'n teks moet goedkeur nie. Die bepaling sê nie dat die

GV na ontvangs van die Paneel se teks of in die afwesigheid van 'n aanbeveling van die Paneel, onverwyld oor die beskikbare teks moet stem nie. Die bepaling sê dat die GV die teks binne 14 dae moet **goedkeur** - enige wetgewende instansie sal dus steeds geregtig wees om in die goedkeuringsproses wysigings aan te bring.

4. Moontlike wysigings wat die ANC in sulke omstandighede kan oorweeg, sluit onder andere in:

- Skrapping van tweederde-meerderhede, ook vir die verskansing van die grondwet
- Skrapping van die 18-jaar-vereiste by stemreg
- Versterking van regstellende aksie
- Skrapping van eiendomsreg
- Verwakking van taal- en kultuurregte
- Verwakking van reg tot vrye spraak
- Afskaffing van toegang tot inligting en administratiewe geregtigheid
- Invoeging van 'n werkershandves (insluitende verbod op "scab labour" en invoeging van minimum-loon)
- Skrapping van vrye ekonomiese deelname
- Skrapping van akademiese vryheid
- Algehele afwatering van beperkingsbepaling
- Algehele horisontale werking
- Skrapping van die tweede Huis van die Parlement
- Verwakking van opposisiepartye se rol in Parlement
- Afskaling van uitvoerende gesag-aanspreeklikheid
- Afskaffing van veelparty-deelname aan aanstelling van regters
- Retrospektiewe misdade
- Afskaffing van kultuurkommissie en kultuurrade
- Afskaling van provinsiale magte
- 'n Nuwe finansiële hoofstuk
- Versterking van beheer oor openbare administrasie

Wysigings aan hoofstuk oor veiligheidsdienste

## **B. WINSTE EN VERLIESE IN DIE ONDERHANDELINGE**

Die resultaat van die onderhandelinge soos gereflekteer in die huidige teks, moet gemeet word aan die vereistes wat die NP in *Our Future Together* gestel het.

### **1. Winste**

A. Die kernsaspekte wat die NP in die Grondwet wou sien, **en wat deur suksesvolle onderhandeling in die huidige teks verskyn**, is die volgende:

‘n Demokratiese stelsel gebaseer op die volgende uitgangspunte:

- 1.1 Een soewereine staat met een burgerskap.
- 1.2 Algemene volwasse stemreg.
- 1.3 Gereelde, vrye, geheime veelparty verkiesings.
- 1.4 Verteenwoordigende en verantwoordelike/aanspreeklike regering.
- 1.5 Grondwetlike oppergesag en verskansing.
- 1.6 ‘n Beregbare en afdwingbare handves van regte.
- 1.7 ‘n Onafhanklike en onpartydige regbank.
- 1.8 Skeiding van magte as beginsel.
- 1.9 Uitvoerige demokratiese kruiskontroles.
- 1.10 Drie verskanste vlakke van regering.
- 1.11 Grondwetlik verskanste verdeling van bevoegdhede tussen die vlakke.

'n Veelparty-uitvoerende gesag

Sterk provinsiale regering ooreenkomstig federale beginsels

'n Tweede huis van die Parlement

Uitgebreide meganismes vir minderheidsbeskerming

'n Handves van fundamentele regte, spesifiek ten opsigte van -

- \* deelname aan ekonomiese aktiwiteit
- \* eiendomsreg
- \* taal en kultuur.

B. Die ander belangrike kwessies vir die NP is die volgende.  
Hulle is ook suksesvol beding:

'n Grondwet verskans met 'n tweederde-meerderheid

Verskansing van die *essentialia* van 'n demokratiese staat met 'n 75%-meerderheid

Grondwetwysigings wat die provinsies raak, moet afsonderlik deur die twee Huise goedgekeur word

'n Verwysing na God in die Aanhef

Die naam "Republiek van Suid-Afrika"

Die vlag

Elf amptelike tale

Behoud van die taalbeginsels in die ou artikel 3

Een Suid-Afrikaanse burgerskap

Universele stemreg vir 18-jariges

Proporsionele verteenwoordiging

Verkiesings op die basis van kieserslyste

Onafhanklike verkiesingskommissie

Nasionale Vergadering bly in beginsel dieselfde

Behoud van die huidige ledetal

Versterking van die rol van minderheidspartye

Verskansing van die Opposisie en die Leier van die Opposisie

Sterk komiteestelsel  
 Beskerming van minderhede se rol in die wetgewende proses  
 Verwysing van wette na die Konstitusionele Hof  
 Volle aanspreeklikheid van die Uitvoerende Gesag  
 Verteenwoordiging van provinsies in die tweede Huis  
 Deelname van die tweede Huis aan die wetgewende proses  
 Behoud van die amp van President  
 Minstens een Adjunkpresident  
 Ministers as 'n reël lid van Parlement  
 Voorsiening vir Adjunkministers  
 Veelparty-deelname by aanstelling van regters  
 Meer parlamentslede in Geregtelike Dienskommissie  
 Verskansing van handves  
 Sterk gelykheidsbepaling  
 Behoud van bepalings oor taal, godsdiens en kultuur  
 Moedertaalonderrig  
 Meer realistiese sosio-ekonomiese regte  
 Sterker kinderegte  
 Akademiese vryheid  
 Versterking van die reg op inligting  
 Betekenis en effek van beperkingsbepaling  
 Retrospektiewe misdade geskrap  
 Beperkte horisontale werking  
 Kultuurrade  
 Kommissie vir kulturele aangeleenthede  
 Provinsiale strukture dieselfde  
 Eie grondwette, wat mag afwyk, vir die provinsies  
 Provinsiale bevoegdhede uitgebrei: eksklusiewe magte en funksies  
 Uitbreiding van lyste funksies  
 "Overrides" beperk: nie-inmenging beginsel is ingevoeg  
 Asimmetrie en subsidiariteit

Sterk bepalings oor interowerheidsverhoudinge en samewerkende regering

'n Inkomste-delingsmodel vir die finansiële verhouding tussen die vlakke van regering

Plaaslike regering as volwaardige regeringsvlak

Behoud van plaaslike regeringshoofstuk

Proporsionele verteenwoordiging en wyke op plaaslike vlak

Plaaslike regering in die Finansiële en Fiskale Kommissie

Erkenning van tradisionele leiers en inheemse reg

Behoud van huidige finansiële beginsels

Onafhanklike Reserwebank

Behoud van Finansiële en Fiskale Kommissie

Professionele, bevoegde en onpartydige publieke administrasie

Onafhanklike Staatsdienskommissie

Deelname aan aanstelling van spesiale grondwetlike ampte en kommissies

Bepalings oor veiligheidsdienste, veral ten opsigte van verantwoordbaarheid

## **2. Verliese**

Veelparty uitvoerende gesag

Twee volksliedere

Enkeltaal-onderwysinstellings

Grondhervormingsklousule

Uitsluiting vir werkgewers

Doodstraf

Aborsie

Toewysing van Parlementslede aan landdrosdistrikte

Parlementêre komitee vir minderhede

Terugverwysing van wetsontwerpe na Kabinet

Ratifikasie van aanstellings deur tweede Huis

Sterker deelname in aanstelling van regters  
 Termyne van regters  
 Grondwetlike beskerming van onafhanklike vervolgingsinstansie  
 Internasionale Deklarasie oor minderhede  
 Raamwerkwetgewing by provinsies  
 Sekere funksies nie op lys van provinsiale bevoegdhede  
 Geen stem vir nie-residensiële belastingbetalers  
 Buurtrade  
 Verhoogde meerderhede by aanstelling van spesiale ampte en kommissies

### C. UITSTAANDE KWESSIES

Die moontlikheid - hoe gering ookal - bestaan steeds om ten opsigte van enkeltaal-instellings, die grondhervormingsklousule en uitsluiting vordering te maak na Woensdag toe. Hierdie deur sal toe wees as die NP aankondig dat hy teen die Grondwet gaan stem.

### D. POLITIEKE OORWEGINGS

1. In terme van die pad wat die NP vanaf 2 Februarie 1990 begin loop het, wat moes uitloop op 'n demokratiese staat met effektiewe minderheidsdeelname en -beskerming, kan die NP beswaarlik **téén** 'n grondwet stem waarvan redelikerwys verwag kan word dat dit aan die Grondwetlike Beginsels voldoen en waarin al die eienskappe wat hierbo in paragraaf B.1 genoem is, uitdruklik verskyn en verskans is. Veral gemeet aan die verskansing van demokratiese uitgangspunte en die ander effektiewe meganismes vir minderheidsbeskerming, sal daar 'n besondere swaar onus op die NP rus om aan te toon waarom hy teen 'n grondwetlike teks stem wat aan die Grondwetlike Beginsels waaraan hy meegewerk het, voldoen.

2. In 'n reeds uiters sensitiewe en onsekere ekonomiese situasie, sal verreken moet word watter opsie die minste skade gaan veroorsaak: 'n grondwet waarmee die sake-gemeenskap weliswaar probleme ondervind, of 'n referendum, met die gepaardgaande voortgesette onstabiliteit en onsekerheid, oor 'n grondwet **waarvan die inhoud tans totaal onseker is.**

3. Ten opsigte van die prinsipiële argument, kan niemand die NP daarvan beskuldig dat hy sy beginsels of sy ondersteuners versak as hy vir die grondwet stem nie. EERSTENS, in die lig van al die winste hierbo aangetoon, en ingevolge waarvan 'n verskanste demokratiese stelsel verseker word, kan die verlies van die uitstaande sake geregverdig word. TWEEDENS is die NP nie alleen reeds op rekord dat hy teen daardie spesifieke aspekte gekant is nie; hy is reeds Vrydagaand in die Grondwetlike Komitee daaroor uitgestem toe besluit is oor watter teks op 8 Mei gestem sal word. Die NP kan nou met groot beslistheid aankondig dat hy onder protes vir die grondwet stem, ondanks die aspekte wat hy verwerp, maar dat hy dit in landsbelang, dalk primêr in belang van sy eie ondersteuners, moet doen. Daar rus 'n geweldige verantwoordelikheid op die NP om die afhandeling van die grondwet nie aan die ANC alleen oor te laat nie. In hierdie lig kapituleer die NP nie wanneer hy vir die grondwet stem nie, maar berei hy die weg voor vir sy nuwe offensiewe benadering as die sterkste opposisieparty. 'n Stem vir 'n grondwet met hierdie spesifieke uitstaande kwessies, kan 'n regverdiging wees vir onttrekking aan die RNE en die opneem van 'n volwaardige opposisierol.